

# O LE SULU SAMOA



EKALEZIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839 O LE SULU SAMOA OKETOPA 2024

## LE TAEAO NAI TIAPAPATA



Laina i luma: Susuga Esera A. Esera FS (Taitai o le Sauniga/Sui Taitaifono Fono Tele), Afioga Toomata Tua AF & faletua Gatoloa'i Tili Afamasaga (EFKS Tiapapata), Efu Efu FT (Toeaina Pulega Apia Sisifo). Laina 2: Ioane Petaia FS (EFKS Vaoala), Dr. Taipisia Leilua FS (Failautusi Aoao EFKS), Melepone Isara FS (Teutupe EFKS), afioga Fuimaono Alex Wright (sui EFKS Tiapapata), Moli Moli FT (Toeaina Pulega Apia Sasa'e). Laina tua: Faafeagaiga Pulega Apia Saute, Sui o le Komiti/Ofisa Faamisionare, ma Sui o le Aulotu Faamisionare fou, le EFKS Tiapapata, i le taeao na faavaeina ai.



Ta'ita'i & Au Mau Tofi o le Sauniga, Laulau o le Fono Tele, Laulau Komiti Au Toeaina, Toeaina Matagaluega APIA, i le Taeao nai Tiapapata, Aso Sa 27 Oketopa 2024.

---

## **O LE FAASINO UPU**

1. O LE LAUGA...2
  2. EFKS TIAPAPATA...4
  3. FAAMOEMOE UA TAUNUU...6
  4. NA O AFIGA E TULEI MAL...7
  5. O LE PEROFETA MULIMULI...8
  6. O E UA FAI I LAGI FOLAUGA...12
  7. ATA O E UA FAI I LAGI FOLAUGA...16
- 

## **O LE LAUGA**

Tusi Faitau: F. Tuai: Pese a Solomona 1:1 – 8  
F. Fou: Fa'aaliga 2:1 – 7

Matua: Pese a Solomona 1: 2, *“Ia sogi mai ia o ia ia te a’u i sogi o lona fofoga; auā e sili ona lelei o lou faapelepele mai i le uaina.”*

Manatu Autu Aso Sa: O se amataga o le alofa loloto (A passionate start)

Manatu Aoao o le Vaiaso: O SE ALOFA NAUNAU MO LE ATUA (A passion for God)

E tusa ma le 1,005 pese na tusia e Solomona, a o le pese lenei ua faalupe, ‘O le “pese silisili a Solomona”, e pei ona faamauiina i le uluai laina o lana pese (Tusi faitau F.Tuai). O le pese i lē “ua alofaina” (the beloved). O le pese o loo talatalafulu ai lagona loloto o le alofa, o loo lagi fetalai’i ai le alofa naunau o le tausala i lana manamea, o le manamea foi i le tausala. Le alofa ua nanamu, ua mafanafana, ma ua feuluuluta’i. Ua oo i le tulaga foi lea ua ‘interlove’, fai mai ai le isi loomatua.

Ou te manatu o le a taatia ia le lavelave o finauga a le au fai tofā ma le au atamamai o le Tusi Paia e uiga i mau eseese i le mafuaaga ma le talaaga o loo lautua i le pese lenei o le alofa. A e o le a ou taumafai e faafaigofie se feau mo tatou e pei ona momoli mai e lenei pese. O le Fesili: O le a le fesootaiga o lenei pese mo oe ma a’u, faapea le Atua?

I le Feagaiga Tuai, e faauigaina le Pese lenei, e faamatala ai le alofa ua fusia ai le mafutaga a le Atua ma ona tagata faatuatua, po o Lona nuu o Isaraelu. Le mafutaga na amata ina ua fetalai le Atua i lana lava pule aoao, *“Isaraelu, o le a fai ‘oe ma o’u nuu, a e o le a fai ‘au ma o outou Atua.”*

O iina le amataga o le alofa loloto o le Atua mo Isaraelu, faapea foi le alofa naunau o Isaraelu i le Atua. Le mafutaga mafanafana na oo ina faamautu i le feagaiga e ala i tulafono e 10 na tuuina ifo e tausi ai le alofa i le va o le Atua ma lona nuu. Faapei ona avaga o le loto o le tausala i lana manamea e faapena foi le alofa naunau o le tagata faatuatua i le alofa loloto o le Atua.

I le Feagaiga Fou, e faauigaina le Pese lenei e faamatala ai le mafutaga i le va o Keriso ma Lana Ekalesia. O le faatoanofotane ma le faatoafaiava. O le mafutaga e paia. E fusia i le alofa ma le faamaoni.

A silasila i le Pese a Solomona 1:2, o loo i ai upu ia, fuaiupu e 2, *“Ia sogi mai o ia ia te a’u i sogi o lona fofoga.”* I taimi o le uluai Ekalesia, o le “sogi paia po o le kisi paia”, o le faailoga e feofofota’i ai i le alofa o le tasi Kerisiano i le isi.

Fuaiupu 2; *“auā e sili ona lelei o lou faapelepele mai i lo le uaina.”* O le uaina o le faailoga o le fiafia i totonu o le Tusi Paia. Peitai e sili atu ona faamalieina ma fiafia le loto i le alofa ua faamaoni, nai lo se isi lava mea faafiafia, e oo lava i le uaina.

Fuaiupu 3; *“O le nanamu o le u’u lelei ua avea ai lou suafa e pei o le u’u ua liligiina.”* O le suafa o Iesu Keriso e nanamu i le loto ua talitonu ma faatuatua faamaoni, auā ua faasilisiliina e le Atua, e ifo ma tapuai ma viia e le lalolagi uma.

I le tusi o Fa’aaliga mai le Feagaiga Fou, o le tusi a le Keriso Toetu Manumalo i le Ekalesia Kerisiano i Efeso. O loo fetalai ai le Keriso Toetu Manumalo i le faafitauli o loo aafia ai le au kerisiano i Efeso. O mea nei o mafutaga faaulugalii, i le va o le tane ma le tamaitai, e umi loa pe tausagā, ona amata loa lea ona sui foliga o le alofa. Tusa e i ai lava le alofa, a e ua lē toe

---

tutusa e pei ona sa i ai i le amataga. Aemaise lava la pe a vaai atu ua amata ona mamae le momosi ma le aulelei o foliga o si tina. Ia pe ua sinā foi le ulu o si toeaina ma faa setusetu lana savali.

E faapena le faafitauli na tupu i le Ekalesia Kerisiano i Efeso. Na fetalai le Keriso Toetu ia Efeso; “*A ua ou lē fiafia ia te oe, ona ua e tuua o lou uluai alofa*” (Fa’aaliga 2:4) Tusa o la e i ai lava le alofa, a e ua lē toe i ai se naunau e pei ona i ai i uluai taimi o le mafutaga ma le Alii. Na ona faataunuu ma fai mea e iloa ai o latou o tagata kerisiano, a e ua lē toe i ai se alofa naunau sa latou faia ai galuega tetele. Ua lē toe lagona foi i o latou loto le tāua ma le mafanafana o le mafutaga ma le Alii.

E tolu lava mea autū o loo i le fuaiupu e 5, o loo toe faamanatu e le Keriso Toetu ia Efeso e mafai ai ona toe foi i le “uluai alofa”. E toe faamumū ai le mafutaga ma le Alii.

Muamua; “*O lenei, ia e manatua le mea na e pa’ū mai ai.*” Ia ‘aua nei galo ia Efeso, o i latou o tagata agasala a ua faaolaina i le Alofa tunoa o le Atua.

Lona lua; “*ia e salamo*”. O le isi faamatalaina o le upu ‘salamo’; o le liliu ma toe foi i le mea na alu ese mai ai.

Lona tolu; “*ma e faia au uluai galuega.*” Ona ua tuua e Efeso lo latou uluai alofa, ua le mafai foi e i latou ona toe faia galuega lelei o le faatuatua sa latou mafaia muamua. Ua le toe i ai se naunau e faitau ma sailiili i afioga paia/Tusi Paia. Ua faavaivai i le ola tatalo. Ua le toe fiafia e mafuta faatasi i sauniga ma isi uso Kerisiano. Ua le toe fia ta’uta’u foi le suafa o le Alii i tagata faapaupau. Ua tauau foi ina leai le alofa e fai ai galuega fesoasoani mo e matitiva. Aisea? Ona ua amata ona avaga lo latou alofa i faiga faapaupau, ma ua faavaivai nisi ona o faafitauli ma puapuaga.

Fai mai le Keriso Toetu ia Efeso, “*Afai e leai; ou te vave alu atu ia te oe. Ou te aveesea lau tuugamoli ia te oe pe afai e te lē salamō.*” O lona uiga, afai e lē salamō le au kerisiano i Efeso ma foi i le uluai alofa, o le a fano lava i latou i le

toasa o le Alii. O le faaupuga lea o le “aveesea o le tuugamoli” mai ia Efeso, o le faamatalaina faigofie i le gagana a tamaiti; o le a se’i e le Alii le palaka ola a Efeso.

O le toe fafagu lea o le Talalelei mo tatou uma. O a mai lou alofa? I le va o oe ma lou toalua. O lau fanau. O lou aiga. O lau ekalesia. A e silisili le Atua? O tumau pea lou alofa naunau e pei ona sa i ai i le amataga? Pe ua amata ona mamae?

O le lu’i mo tatou: Ia toe faamumū le alofa e pei ona sa i ai i le amataga. Toe foi i le uluai alofa. Faapei ona naunautai o le tausala i lana manamea i le amataga o le alofa loloto, e faapena le tulaga e tatau ona i ai le mafutaga a le tagata ua moni lona alofa i le Atua.

O le tausala uliuli o loo i le Pese a Solomona lea na naunau i ai le tupu, o le ata lena o le tagata ua pispisia i le agasala. A e ui ina uliuli, sa nanamu pea i le Atua lana tagata. E inoino le Atua i le agasala, a e alofa mutimutivale i le tagata ua agasala.

O le taunuuga o le amataga o le alofa loloto o le Atua mo le tagata agasala, lea na auina mai ai lona Alo pele e toatasi. O Ia o le Faaola, o le Keriso, o le Mesia. Na maluu ma toetu manumalo. Ua Ia folafola mai foi e toe afio mai o Ia, e feiloai ma lana manamea poo lana Ekalesia.

Ia tumau pea i le Atua lona viiga e faavavau. Amene.

**Susuga Laupama Tokan Solomona FS,**  
**EFKS Sogi, Pulega Apia Sisifo,**  
**MATAGALUEGA APIA.**

***“Faauta, o le fanau, o le tofi lea mai le ALII; o e ua fanau mai, o le tau lea mai ia te Ia.”***

O le masina nei na faailogaina ai le Lotu Tamaiti lona **126**, talu ona amata mai i le 1898. O le Fono Tele ia Me 1898 na pasia ai le faia o se Aso Sa faapitoa mo fanau a le Ekalesia, ma faia ai le uluai Lotu Tamaiti i le Aso Sa **26 Iuni 1898**. O le tausaga 1909 na suia ai i le Aso Sa lona tolu o Oketopa (faavaomalo). E oo mai i le 1930 (le Senetenari), ua fai i le Aso Sa lona lua o Oketopa, e pei ona oo mai ai nei. Ia faamanuia le Atua i alo ma fanau uma a le EFKS, o outou le lumanai o le Ekalesia.

**F. Tolua**

---

# ***O LE AULOTU FAAMISIONARE FOU, EFKS TIAPAPATA.***

---

*“O le aso lenei ua faia e le Alii; ia tatou olioli ma fiafia i ai.” “O le mana’o ua taunuu, o le laau o le ola lea.” “Ua faia e le Alii mea tetele mo i tatou; ua tatou fiafia ai.”*

O le Aso Sa 27 Oketopa 2024 se tasi o taeao fou mo le EFKS, o le Matagaluega Apia aemaise i le Aulotu o le Ekalesia Faapotopotoga Kerisiano Samoa i Tiapapata. O le Aso Sa lea na faia ai le sauniga lotu e aloaia ai le faatuina o le aulotu fou i Tiapapata, e tusa o le I’ugafono a le Fono Tele 2023, na faatino e le Komiti Faamisionare e ala i le Ofisa Faamisionare o vaaia e le Failautusi Aoao a le Ekalesia. O lenei sauniga lotu na faataunuuina i le maota o le susuga A’oa’o Fesoasoani Toomata Tua AF, o ia sa fai ma sooupu mo i latou o aumau i lea vaega o le fanua. Na ta’ita’i le susuga Esera Auatama Esera FS, le Sui Taitaifono Fono Tele, o le Tusi Paia na faitauina e Melepone Isara FS le Teutupe a le Ekalesia (Esekielu 3:1-4, Fa’aaliga 10:8-11), o talosaga na taitaiina e le Failautusi Komiti Au Toeaina, susuga Amuia Seuala FT.

O le Taitaifono o le Komiti Au Toeaina, Asotasi Gu Time FT, na ta’ita’iina le vaega faapitoa o le sauniga, mo le faatuina o se Aulotu fou. Na fa’aaogaina nisi vaega o le Faasologa o le osiga feagaiga a aulotu ma latou faifeau, o loo i le tusi failotu Ia Viia Lou Suafa, (ona e le o i ai se Faasologa faapitoa mo le faatuina o se Aulotu fou.) Na mae’a, ona saunoa lea o le sui o le Aulotu, le A’oa’o Fesoasoani ia Toomata Tua AF, e fofogaina lo latou agaga faafetai ma le viiga o le Atua, ona o le faatofalaiga a le Ekalesia, ua faatuina ai lenei Aulotu, latou te tapua’i ai.

O le Failautusi Aoao o le Ekalesia, susuga Dr. Taipisia Leilua FS na ia tala ‘oto’oto le faasologa o laasaga uma o lenei mataupu, seia taunuu mai i lona faatinoina i lenei aso:

## ***1. Mau a le Matagaluega Apia mo le Fono Tele Me 2023.***

> O le Mau a le Matagaluega Apia, ina ia faatuina se Aulotu i le fanua o le Ekalesia i Tiapapata, ona ua faatoateleina le atunuu ua aumau ai i lea vaega eleele.

> Na faapea foi ona pasia e le Komiti Faamisionare ma tuuina atu ai i le Fono Tele ma pasia ai lona faataunuuina loa.

## ***2. Aso Tofi, 12 Oketopa 2023.***

> Amata ai ona aga’i le aufaigaluega Faamisionare ma Pepa Faatumu, ma faatumuina e ala i le faatalatalanoa o nai Aiga sa maua i lea aso ma lea aso. Sa faapea ona aga’i i tua i isi nofoaga i Tiapapata ma asia nai aiga o loo nonofo ma aumau ai.

> E 9 Aiga sa mafai ona asia i lea aso muamua - 4 e lolotu EFKS ma isi o loo auai i lotu pei o le Mamona, AOG, SDA. Sa le’i mafai ona asia nisi aiga ona o tulaga o le leai o nisi ma sa lokaina a latou pa.

## ***3. Aso Gafua 16 Oketopa - 13 Novema 2023:***

> Toe asia ai isi vaega o le nofoaga i Tiapapata, mo le faamoemoe e pei ona amataina. O le taunuuga o lea galuega - 15 Aiga na mafai ona tatalaina o latou faitoto’a e talatalanoa e tusa ma le faamoemoe.

> Na faamanino le faamoemoe o le Ekalesia e fia faatuina se aulotu i Tiapapata, e tusa ma le mau a le Matagaluega Apia ma ua pasia e le Fono Tele 2023. O le toatele o aiga na mafuli lava i lo latou lagolagoina o lenei faamoemoe, e ui lava i le esese o tapuaiga o loo tausavali ma lolotu ai.

## ***4. Fono Komiti Faamisionare amataga Iulai 2024:***

> Toe ta’ua ai lenei faamoemoe i Tiapapata i Mataupu Laga o lea fono, ma ua laualuga ai le tatau ona toe fa’auau le faamoemoe mo se aulotu i Tiapapata.

> Sa toe fa’auau loa ona malaga le Ofisa Faamisionare i Tiapapata ma toe faatalanoa Aiga e uiga lava i le faamoemoe e pei ona sa talanoaina i le 2023. Sa toe asia nisi o aiga nei, ma faia ai le tonu, mo se avanoa e feiloa’i ai aiga uma ua latou talia lea faamoemoe.

---

### **5. Aso Lulu, 4 Setema 2024, 6.00 afiafi.**

> Ua faamoemoe o le a feiloa'i ai i le maota o le susuga A'oa'o Fesoasoani, afioga Toomata Tua ma le faletua ia Gatoloa'i Tili Afamasaga, e talanoa ai lenei mataupu, ma o le a feiloa'i ai foi ma le Laulau a le Komiti Faamisionare/Laulau o le Fono Tele.

> E 6 Aiga sa auai i lea afiafi, a e 5 isi Aiga sa le mafai ona auai atu ona o tuatuagia le ma'alofia. E to'a 25 le aofai o tagata uma sa auai i lea afiafi, e aofia ai ma sui o le Ekalesia ma le Ofisa Faamisionare.

> I le feiloaiga o lea afiafi, sa talanoa mai ai nai aiga uma na auai, e taoto atu le faamoemoe o le Komiti ma le Ekalesia o le a saili so latou finagalo ona toe feiloai ai lea.

### **6. Aso Tofi, 19 Setema 2024:**

> Taunuu i le Ofisa Tutotonu le Tusi mai Aiga i Tiapapata, e faailoa mai ai lo latou finagalo e tusa ma le faamoemoe o le Komiti ma le Ekalesia. E to'a 9 Aiga Lotu na saina ai, ma ua latou faailoa mai ai le agaga fiafia ma lo latou matua lagolagoina o lenei faamoemoe.

### **7. Aso Lulu, 25 Setema 2024:**

> Tusi mo le Aulotu i Tiapapata na faailoa ai le faamalo ma le agaga faafetai i le taunuuga lelei o lenei faamoemoe, ma faailoa ai le finagalo o le Komiti Faamisionare e tusa ai ma le gasologa i le lumana'i. Sa faailoa ai loa i lea tusi, o le a faapea ona faatinoina se tapuaiga e amata aloaia ai le Aulotu i Tiapapata, i le Aso Sa 27 Oketopa 2024.

### **8. Aso Sa, 27 Oketopa 2024.**

> O le itula 10.00 taeao, i le maota o le susuga A'oa'o Fesoasoani ia Toomata Tua Afamasaga ma lona faletua ia Gatoloa'i Tili i Tiapapata lava, o le a faataunuaina ai le ulua'i sauniga lotu o le Aso Sa mo le Aulotu EFKS Tiapapata.

> O le faamoemoe maualuga o le a faapea ona auai uma Aiga lotu o le a faatuina lenei Aulotu, faapea le mamalu o le Komiti Faamisionare ma le Ofisa Faamisionare, tainane foi le pa'ia i Tama Toeaina ma le Matagaluega Apia e auai, e molimau ma patipatia lenei faamoemoe tāua.

> E faailoa atu ai foi mo le silafia, o le mae'a ai o le sauniga lotu muamua lenei i le Aso Sa 27 Oketopa 2024, o le a faapea ona fa'auau ai lava sauniga lotu mo le Aulotu Faamisionare i Tiapapata, ma o le a faia lava i le maota o le A'oa'o Fesoasoani ia Toomata ma le faletua. O lea ua i ai le fuafuaga a le Ekalesia, mo le amataina loa o le galuega mo se falelotu i le fanua i Tiapapata i se taimi vave, e mafai ona faatinoina ai sauniga lotu.

Peitai mo le taimi nei, o lea ua fesoasoani mai le afioga ia Toomata ma le Faletua ma le Aiga, mo le fa'aaogaina o lo latou maota mo sauniga lotu, e faatali ai le mae'a o le galuega mo se falelotu i le fanua o le Ekalesia e pei ona fuafuaina.

### **Suafa o le Aulotu ua auai:**

1. Toomata Tua & Gatoloa'i Tili Afamasaga & fanau (4) - EFKS Samata-tai/EFKS Lalomalava.
2. Matautia & Fesuiaina & Fanau (1) -EFIS Vailima.
3. Papalii Reupena Rimoni & Faatafa - EFKS Vailima.
4. Mulipola Ronnie Mann - EFKS Tanugamanono.
5. David Meredith - EFIS Apia
6. Fuimaono Alex Wright - Katoliko Roma
7. Faapala & Fanau (2) EFKS Samata-tai
8. Taofi Fua & Fanau (1) - SDA
9. Foilani Maua - EFKS Vaivase tai
10. Sam Ieriko Sopoaga - EFKS Alamagoto
11. Isaako - EFKS Fugalei - Ketesemane Fou
12. Fonoti - EFKS Toamua
13. Dr. Lameka Sala & Luisa.

O le Lauga na saunia e le Taitaifono Komiti Au Toeaina, na autu lava i le TFA, O Gutu: Faasoaina ai le Upu a le Atua. Na faaopoopo le ta'ita'i o le sauniga, o le faamanuia e pei o la le apusetolo ia Filipi, "*O lenei, o'u uso e, o e ou te alofa ma naunau i ai, o lo'u fiafia ma lo'u pale, ia faapea ona tumau o outou i le ALII..Ia outou olioli i le ALII e le aunoa... 'Aua le popole outou i se mea e tasi, a ia faailoa atu o outou mana'o i mea uma lava i le Atua...O le manuia foi mai le Atua, o loo silisili lava i mea uma.."*

Na aoina le Foa'i mai le faapotopotoga o le tapuaiga e pei ona masani ai, faaopoopo ma Foai Faapitoa mo le faamoemoe o lenei sauniga.

O le **Seleni Faavae o le EFKS Tiapapata** e pei ona sa aoina, faamau ma faapa'ia i lea aso:

Sene na Aoina \$1,340.50

Meaalofa:

Rev. Esera A. Esera	500.00
Rev. Ioane & Manuia Petaia	200.00
Rev. Dr. Taipisia & Vaisola Leilua	400.00
Rev. Poasa & Lemina Toiaivao	200.00
Misa Faalavaau Dr Navy Collins	100.00
Sueala Koon Wai Yoo	100.00
Hana Alefosio	50.00
Afamasaga Tapeni	100.00
Rev. Letupu & Helen & EFKS LOA	1,000.00
Rev. Melepone & Tupe Isara	1,000.00
EFKS Vaoala	500.00
Matagaluga Apia	1,000.00
Ekalesia Aoao	<u>5,000.00</u>

**AOFA'I** **\$11,490.50**

O le faamoemoe ia tofia se Komiti a le Aulotu faatasi ai ma le afioga i le Teutupe a le Ekalesia Aoao, ma ia faia se Tusitupe a le EFKS Tiapapata. Na mae'a le sauniga ona saunoa lea o le afioga Fuimaono Alex Wright fai ma sui o le Aulotu, e molio'o le faamalo ma le faafetai i le ta'ita'i o le sauniga ma le au mau tofi, tainane le mamalu o le faapotopotoga i lea sauniga, mo lenei taeao faamoemoeina ua faataunuu. Sa faapea foi ona auai uma i le valaau fa'aaloalo mo le Toona'i na saunia e le Ofisa Faamisionare ma le Aulotu i Tiapapata, ma tualuga ai i fa'aaloaloga mo le Sui Taitaifono Fono Tele ma le vasega o Toeaina i lea taeao.

O le Aso Sa na soso'o ai, 3 Novema 2024 na faia ai le sauniga o le ulua'i Sakarameta o le Faamanatuga a le Ekalesia. O le afioga i le Taitaifono Fono Tele, susuga Tunumoso Soliola Iosia FT, na ia ta'ita'i lea sauniga. Sa le'i mafai ona auai o ia i le Aso Sa talu ai, ona o tuatuagia i sauniga faapitoa a nisi foi Aulotu i Matagaluga i Fafu, ma ua talafeagai lona toe taliu mai i Samoa, ma le ulua'i Faamanatuga a le Aulotu Fou i Tiapapata.

Ia manuia tele le Aulotu Faamisionare fou, le EFKS Tiapapata, o le Matagaluga APIA, i le alofa o le Atua, ma Ia Vi'ia lou Suafa e faavavau.

F. Tolua

**O LE FAAMOEMOE UA TAUNUU**

O le masina nei na faataunuu ai se tasi o faamoemoe tele o le atunuu ma le faigamalo a Samoa, o le fonotaga lona 27 a Ulu o Malo o le Taupulega (Commonwealth Heads of Government Meeting (CHOGM)). Na amata i fono a komiti i aso 21 - 24, a o le fono tele sa faia i aso 25 - 26 ina ua taunuu i fanua le faauluuluga o le Taupulega a Malo Afaatasi, o Tupu Salesa III ma le masiofo ia Kamila. O se faamoemoe sa aafia tele ma auai ai le EFKS i lona tapenaga i le tele o itu, sa o faatasi ma lana tapuaiga tatalo e talosia ai le faamoemoe o faigamalo. O le tele o Aulotu sa aafia i le teuteuina faamatagofie o aai, maota ma laoa aemaise o tafaala. Na tuua uma ai Kolisi. O le Kolisi Faafai feau i Malua na valaauina faatasi ma Piula, ina ia latou lagi viiga o le Atua i sauniga amata o le fono, ma lagi le Vi'i o le Saolotoga. Ia silafia, o le fati i nota ma upu o le Vii o le Salotoga, na teuteu ma o loo lomina i le Tusi Pese EFKS, Ina Pepese Ia, #450. O se fonotaga e tulaga ese i le tala faasolopito o le atunuu, le Pasefika ma le lalolagi atoa. O se matati'a le avea o Samoa e talimalo i se fonotaga tele faapenei, mo le taimi muamua i le Pasefika. O le ulua'i fonotaga foi talu ona tu'umalo le Tupu Tamaitai o Elisapeta, ma le uluai fonotaga talu ona tula'i mai lana Maiesetete Tupu Salesa III. O le taitaifono o le fonotaga, o le Tamaitai Palemia o Samoa, Afioaga Hon. Fiamē Naomi Mataafa, o le tiakono o le EFKS, ma le sui o le Komiti Tupe mai se tasi o ana Matagaluga. E 56 malo mai Aferika, le atu Keripiane, le atu Amerika, Europa, Asia ma le Pasefika, sa auai i le fonotaga; o malo ma atunuu e mafuli i le au Kerisiano ma le faatuatuaga ia Iesu Keriso.

Na mae'a le fonotaga toe taliu usufono i o latou malo, a e faamauina la latou faafetai ma le faamalo, i tagatanuu o Samoa mo le taligamalo lelei ua saogalemu ma manuia ai le faamoemoe. O lea foi le agaga o le Tamaitai Palemia i Ekalesia ma afioaga uma, Upolu, Savaii, Manono ma Apolima, i komiti ma le au galulue, a e sili i le tapua'iga a Ekalesia ma le atunuu. Tau ina ia fai lea ma viiga o Iesu Keriso, le Atua o loo faavae ai Samoa.

**Samoa tula'i, ua agiagia lau fu'a, lou pale lea!**

F. Tolua

---

# NA O AFIGA E TULEI MAI FOFOGA O LE ALII

## TATALO PEA!

## O LE TAUMAFATAGALELEI

*“Ua le’i maua e outou, auā ua outou lē ole atu.”  
Iako.4:2.*

O le tele o tatou faiaina, e mafua mai ina ua tatou toilalo e tatalo. Pe a tatou iloilo i o tatou sesē, ona tatou maua lea o se fata faitaulaga o avanoa, ua tuulafoa’iina, ma se Tusi Paia o loo tapunia pea e le’i susu’eina ma tatala ona lautusi. O loo faaupu mai e Iakopo faapea, *Ua le’i maua e outou, auā ua outou lē fesili/saili/ole/tatalo/faatoga i le Atua.* Na tusia e se tasi tusitala Kerisiano: A o aveva ma kerisiano talavou sa tauau ina mu ma faasolo ina uma le malosi, na ou lagona i se tasi aso, o lo’u ola faalagolago i lo’u lava malosi sa leai se aogā. Na ou iloa i lea taimi e tatau ona ave o’u faaaitauli i le Atua. I nisi faaupuga, ua tatau ona faatele ma saga faapoopo a’u tatalo. O le a’oa’oga a Iesu mo i tatou e pei ona faamau e Mataio 7:7, *Ia saga ole atu, ona foaiina mai ai lea ia te outou; ia outou saga saili pea, ona outou maua lea; ia saga tu’itu’i malosi ona tatalaina mai ai lea o le faitotoa.*

O nisi taimi seiloga lava ua tatou tautau i le pito maea, ona faato’ā tatou liliu lea i le Atua e ala i le tatalo. Ma e oo lava i ia taimi, pe afai e lē vave tali mai le Atua, ona tatou faavaivai lea ma taofi, ua uma le fia valaau i le Atua. O loo a’oa’o mai pea le Tusi Paia ina ia tatou ‘faatali’ i le Atua. Aiseā? Auā foi, a o tatou faatalitali, o le taimi lena o loo galue le Atua. O nisi taimi o loo galue o Ia i mea o tatou ole atu ai, a o nisi foi taimi e galue mai o Ia ia i tatou. O taimi ia o loo Ia faasa’osa’o ma faatonutonu o tatou mana’o ma mea e lilifa i ai o tatou naunautaiga, pe faatonutonu i tatou ina ia tatou faasaga e fai lona finagalo moni. ‘Aua le na o le tatalo; a ia tatalo soo, tatalo faatauana malosi. ‘Aua tatou te taumafai e faataunuu manaoga i o tatou lava manatu ma a tatou auala. Ave uma i le Atua, pe a tatou tatalo. Ia manatua, ua uma ona Ia folafola mai, *“13 E saili mai outou ia te au, tou te maua foi, pe a outou saili mai ia te au ma outou loto atoa.” Iere.29.* O le mea lea, ia tuu lou loto atoa i lau tatalo, ia faatalitali ma le filemu i Lona faatasi mai, ma faalogo ma le manino i Lona fetalai mai. E le pine ona e ofo i auala e tali mai ai o Ia. **ET.**

*“35 Ua fetalai atu Iesu ia te i latou, ‘O a’u nei o le areto o le ola. O le sau ia te au e le fia ‘ai lava ia.’” Ioane 6.*

O le i’uga mata’utia o le Taua Lona Lua a le Lalolagi i Europa, na tuua ai tamaiti e faitau afe faitau miliona, sa fia ‘a’ ai ma sa leai ni aiga. Na avatu i latou ma tausi i togalauapiga tetele, na fafagaina ai ma tausia ai i latou. Ui i lea, sa lē maua sa latou moe lelei i le po; na o le fefefe, popole ma le atuatuvaile. Na lē iloa e i latou sa tausia tamaiti, pe se a le mafuaaga na faapea ai; na fiu i latou e saili le mafuaaga ma se fofō o lenei faaaitauli, se’ia oo ina a’oa’o ina i latou e se foma’i o le mafaufau, le foma’i faasaikolosi. Na ia a’oa’o atu i latou, ina ia amata ona tuuina atu i tamaiti taitoatasi, se fasi falaoa i po taitasi; o fasi falaoa e lē ina ia ‘ai, a ia uu mau i o latou lima a o taotoo i moega sauni atu e momoe. Na matua’i ofo i latou i le iuga o lenei a’oa’oga ma le auala na faasino atu e le foma’i saikolosi. Na momoe filemu tamaiti i le po atoa aunoa se popole pe fefe. Aiseā? Auā na momoe ma le mautinoa, o loo i ai la latou mea’ ai mo le isi aso; o loo i ai le fasi falaoa i o latou lima mo le aso fou. O le ‘u’u o le fasi falaoa i o latou lima, na avatua le lagona o le **malu puipuia** (o loo saogalemu), o le lagona o le **faatāuaina** (o loo i ai se tagata o loo tausia ma vaai mo lo latou manuia), ma le lagona o le **fiafia** (e toe maua foi isi fasi falaoa taeao).

O mea na e tolu sa manaomia e na tamaiti – ma o mea foi na tatou te manaomia. Ma o nei mea uma e maua i se mafutaga ma se fesootaiga faafaia ma Iesu. Ina ua fetalai o Ia, *“O a’u nei o le areto o le ola. O se sau ia te a’u e lē fia ‘ai lava o ia”*, o loo Ia fai mai, ‘O a’u nei e tatau mo lou agaga, e pei lava ona tatau le mea’ ai mo lou tino’. O le mea’ ai, e laugatasia uma ai tagata uma. E lē na o se vaega faapitoa o tagata po o se itu e tasi o le lalolagi. E maua i soo se ituaiga foliga ma soo se telē. O le sikoni i Peretania, o le pizza i Amerika, o le talo ma le palusami i Samoa. I se faaupuga faigofie, o loo faamanatu mai Iesu, o Ia tatou te laulelei ma maona ai, i soo se nofoaga, i soo se taimi. O le mea lea, ia mautinoa e faitau lau Tusi Paia, o lau taumafataga lelei lena e te laulelei ai i aso uma. **F. Tolua**

---

# ***O LE PEROFETA MULIMULI***

***(O le tala faafagogo ua faaSamoaina mai le tusi, The Last Oracle, tusia e James Rollins)***

“O le faaositulaga manaomia mai ni tamaiti toaitiiti, o se mea faatauvaa pe afai e faatusatusa i le anoanoa’i o faafitauli e sopoloa aunoa ma le tagofia i aso uma e le lalolagi.”

Na faitauina e Karai le manaomia o le faamaoniga o loo i tua atu o le vevela tuputupu a’e i totonu o ana tala. “O a faamoemoega?”

“E lē o se mea itiiti ifo nai lo le suia o le laasaga o le talafaasolopito o tagata o le lalolagi.”

O iinei na susulu manino mai ai le mata’utia o le tamaloa. Na oo lava ina nofo sa’o i luga ma punou atili atu ia Karai.

“O le faasolo mai o senituri, e tulai mai ai se tagata na te suia atoa le talaaga o le lalolagi – se tagata na te suia atoa le auala o le olaga o tagata.

O lea ou te tautala atu i le laina o perofeta lauiloa.

O Puta, Moameta, Iesu Keriso. O se tasi e tulaga ese lona mafaufau, na te vaai atu i le lalolagi i ona fofoga tulaga ese, o ona mafaufauga ma manatu e suia atoa ma tata’i ese ai le ala o tagata i se isi laasaga fou. O fea e tupu a’e ai se ituaiga tagata faapea? O fea e tula’i mai ai sea ituaiga mafaufau?”

Na feminoia’i Matesone, o tau fālō se migi i lona tua.

Na toe manatua e Karai le talanoaga a le polofesa faasino i autisema ma lona sao i le tala faasolopito o le lalolagi. Ma le upu si’i na ia fa’aaogā. Pe afai a e tupu i se mea maneta, e aveesea autisema mai le lalolagi, ona vaaia lea o le tagata o loo nofonono ma fiafia e si’osi’o le ta’inafi laau i luma o le gutu o le ana.

“Aisea e faatali ai i le lafoga sa’o o le maa taisi faakenera?” na fesili ai Nikolao. “Afai e mafai ona tula’i mai ma iloa tino, se tagata tulaga ese faapenei, ma mafai ona faagutu ma saisai, faatonutonu mo le manuia o tagata uma, ona tatou mafaufau lea ma manatu i se tupulaga fou ma se lalolagi fou o le a fausia. Aemaise lava pe afai o lena tulaga ese e mafai ona faamaualugaina i se laasaga maoa’e.”

Na faataatia le pupula o mata o Nikolao ia Elena.

Na amata ona malamalama Karai i le lautele o le vaaiga i le poloketi. E lē na o se polokalame faasipai. O le faalapopotoga a Nikolao na fuafua latou te umia le faagutu o le tala faasolopito, e ala i le fa’aaogaina o tagata mama’i popoto

faapitoa taitasi e pei o solofanua. Ma na amata ona masalosalo Karai i le mafuaaga na tuu ai Nikolao i lenei tulaga mamalu ma le paoa. E i ai se tasi na ia faatonutonuina o ia e fai ma taulamua, na ia faaoso ma lafi mai tua o taulumaga o loo fa’aaoga ai tamaiti atamamai faapitoa. Na taumafai Karai e faaata i lona mafaufau lenei taleni uma i le tau faamalieina o le tagata e toatasi. Sa le’i mafai e Karai ona natia lona te’i ma le fefe. “E faapefea ona outou fuafua e – ?”

“Ua lava lena!” na ‘ote atu ai Nikolao. “O lena ua e malamalama lelei i lo matou faamoemoe, ua mafai ona e iloa le mea matou te manaomia ai le toe faafoi mai o Sasa. E taua o ia i le polokalame... aemaise lava ia te a’u.”

Na faitau e Karai se mea i ona mata. “Aisea oe?”

“Aisea?” Na ia pupula malosi ia Karai. “Leaga e sili atu o ia nai lo na o se mataupu mo su’esu’ega, o ia o lo’u afafine.”

Na oloolo atigilima o Elena i le itu i lalo o le tapulima o Karai. Na liliu vave le fafine faasaga ia Nikolao. E manino mai sa faapea foi ona faate’ia o ia i lenei tala a Nikolao. E leitioa lava a toso uma mai Karai ma isi ua oo mai i Kerenopili.

“A e le’i uma le aso lenei, o le a outou iloa le mea e oo i ai lo’u ma’ema’eā.” Na punou atu Nikolao ia Karai, ma ona mata ua mūmū i lona inainā. “Ma o le a ou toe aumaia lo’u afafine.”

8.20 taeao.

Atumauga Urale i Saute.

Na tula’i Ta’ita’i Aoao o Savina Maratovi i le fatu o le Gaioiga Saturina. O ona tua atu, na tu faatalitali ai le nofoaafi o maina i le auala, o taalili ma pa’ō, a o nanamu le manogi o suauu ma le asu. Na malolo pe tusa e selau iata mai le mea e gata ai le auala i le Maina Lavelave 337, o se maina uranimo ua lafoa’iina ma ua pei se faamoega lagomeli i atumauga o Urale o tuaoi. O le Maina Lavelave 337 sa nonofo ai pagotā i Keliapiniki 88, na faaalu le sefuluvalu itula i le aso e galulue ai i le pogisa, a o faaonā malie i latou.

Lea la ua avefa ma nofoaga e lafoa’i i ai masini ma meafaigaluega malepe o maina faapea faaputuga ma’a mai le Gaioiga Saturina. I le



---

gasologa o le lima tausaga, na faatumulia ai e se vaega toaitiiti o eli maina ma inisinia faapitoa e faatama'ia masini, le tele o paipa e tutumu i otaota na eli atu mai lenei nofoaga.

O Gaioga Saturina na nofoia se ana na fausia i autafa ese o le auala o nofoaafi. O le potu faatumulia—o lona telē e pei o se faapaologa o se fale talimalo—na fausia i fatāmanu suā'ua ma faatumulia i meafaigaluega eli maina: o fusipa'u, o uili ma uini, auvili eseese, o pamu ma faagaau, o mea uma nei sa faaputupu faataamilo i autafa o se masini tu'i ma eli palapala. O le tele o nei mea e faataatia ai lava i le mea na tuua ma lafoai ai e le nofoaafi.

Na vaai atu Savina a o sasa'a atu le uta o maa ma palapala i totonu o se tasi taavale la'u uta a le nofoaafi i ona tua. O le a alu le nofoaafi ma lana uta mulimuli i le ML 337.

Sa sologa lelei mea uma e tusa ona fuafuaina.

Ui i lea, na ia tu ma ana moto i ona puimanava, o ona vae o faavā a o ia maitauina le nofoaga o fai ai le galuega. O la la'ua talanoaga ma Nikolao o loo faafatuulu lava i lona mafaufau. Na ia iloa lava o le tamaloa e ulumalō ma e faigofie ona toilalo i faai'uga vavave ma le to'atama'i. Na salamō Savina ina ua ia ta'u i ai o Sasa. Na te le'i manatu o le a tali mai o ia i se tulaga faavalevlea tele.

O fea sa i ai lona lē fiafia i mataupu faapenei? Na i ai pea ia i latou le sefulu o sui Omega, e lava ma totoe e totō ai le aai fou i Mosokou. O le sefulu lona sa i ai le malosia e lava telē latou te tau'a'aoina atu o ia i le lalolagi, ina ia ta'ita'i le fanau a tagata i lana Faafouga fou, e ta'ita'i e se Emepaea Rusia toetu. Ma o le tupusā faalioli o le a lē na o le tasi le Raseputino na te fautuaina o ia, a e to'a sefulu. Sefulu savana tutu'a, pe a tutū faatasi ma fefiloi faatasi, latou te mafai ona lolo'u maia le taimi ma le vava mamao, e auauna ia te ia.

Pe na te le'i iloa ea lona mea?

O le a se tāua o le tamaitiiti e toatasi, e tu fesaga'i ma se visiona faapea?

E toalua, pe afai e faitau ai ma le atalii o Nikolao, o Piota. Peitai o le taleni a le tama, e ui ina malosia, a e itiiti sona tāua. O le a se aogā o le lagona alofa pe a oo mai i le toe tau fausia o se lalolagi fou? E na o le fai ma faalavelave. Na pau le mea o le a leiloa faatasi ma le tama o lona agavaa faakenera. O se mea e leiloa mataina, a e lē se

mea faapea e lē mafai ona gafatia. Ma sa i ai pea le faamoemoe e toe maua mai le tama. O le taimi mulimuli na logo mai ai e Lutena Porasakova e faapea o le a aga'i atu i lopala o Asanova. O le a faigata ona iloa se mea i le pogisa, peitai o lea ua oso le la, e lē toe mamao a e maua mai se tala fiafia. O lana tala lona sa fai ia Nikolao.

A e leai foi se afaina pe afai o le a ese se tulaga e oo i ai. O le a iloa lava e Nikolao.

Na alu atu ia te ia se alii inisinia ofu talaloa papa'e, o se pulou malō, ma se ufifoliga faamānava. O se inisinia mai le Inisite o Sagato Pitasipeka o Eliga Maina. "Ua sauni e faata'ita'i le laupapa ma le li'o lapotopoto, le irisa."

Na lue atu le ulu o le tamaitai. E uma loa le siaki mulimuli lenei, ona o ese uma loa lea mai le nofoaga o le faagaioiga. Na ia tulei malosia lana vaega i le lua aso talu ai ina ia faataunuu uma faatinoga i se taimi puupuu. O le taotoga o Nikolao na fuafua e faataunuu i le asō, sosoo ai ma Savina i le isi lua vaiaso. Peitai o le faalataina talu ai e Mapeletope, na fai ai le faaiuga ina ia faatino taotoga uma nei e lua i le aso e tasi. Na faalogo loa o ia ua manuia le taotoga o Nikolao, ona ia sauni loa lea e fa'auau.

"E i ai ni faaletonu?" Na ia fesili atu ai i le inisinia. Na gogolo mai le leo o le inisinia mai totonu o le pupuni foliga a o la'u savavali. "Ua uma ona faatamo'e uma su'esu'ega, toe siaki uma suauu o amoni, faatino le fa'ata o le ova avega mo le taimi mulimuli, ma toe iloilo lelei uma fesootaiga faaeletise. Ua matou sauni mo lau faatonuga e faaavanoa le nofoaga ma tatala le irisa. O le a fai nei loa le fana o faataitaiga."

"Lelei tele."

Na mulimuli atu Savina i le tamaloa i lalo o fatāmanu. O le masini eli pu sa toso e le taavale ua uma ona aveese mai le auala. O tamaloloa sa galulue i autafa o se avanoa pu moomoo: i le 'eliga, o luga o le fola, ma autafa o masini faigaluega. Na tepa a'e Savina i le puipui pito i luga o le ana. O se paipa u'amea e lua mita le lautele na faasaga tu sa'o i luga, o nonoa ma pipii ai se fusi pa'u sosolo, o sisina mai ai vai mai ni faaga'au. Na emoemo mai matauila mai le itu mamao o le paipa u'amea, pe tusa o le afa kilomita le mamao ese. O nai ataata laiti na fegaoioia'i solo mai le malama. O le vaega e nafa ma le faatamaia o le nofoaga o loo fai le siaki mulimuli. Na ia fiafia tele i le mae'ae'a o la latou galuega.

---

E silia ma le limasefulu pu paipa – o le mafiafia lapotopoto e pei o le lima matua ma le loloto tusa ma le mita e tasi – na vili i le faatausi'usi'uga o le paipa uamea, ua faatumu i supaafi malolosi o le ANFO. O nei pu paipa e tata'i ma ui i se pu sa taoto i lalo ifo o le Vaituloto Karakei. Na faauaea ina ia pa pa i se faasologa, e tata'e ai se pu tele i le ta'ele o le vaituloto oona, ma sasa'a atu ai ona otaota o kasa faaniukilia, o satorotiuma ma sesiuma, faasasa'o i totonu o le paia uamea. "Maliu mai iinei, lau afioga i le Taitai Sili." Na tālo atu le inisinia ia Savina ina ia alu ese mai le ogatotonu o le ana.

Na faatu i totonu o le fola se faitoto'a faalapotopoto e tolu mita le lautele. Na ia maua mai le vaega e taula ai vaa o le maligi i Murumanaki. O le ituaiga faitoto'a faapapomu i le sami aupito lata mai lea, e ono ona falake ta'i afa mita le mafiafia o u'amea e foliga i ni faataamilo o le i'oimata.

Na laa ese mai Savina ma alu atu i le mea sa i ai se laau komepiuta feavea'i mo su'esu'ega, sa i luga o se laulau. O le ofisa faatekonolosi na ia tatala ma faailoa i luga o le laau, le polokalame faainisinia ua sauni. O isi tamaloloa na latou tutū ma matamata ai.

Na tautala atu o ia i se leitiō, faalogo, ona lue atu lea o lona ulu ia Savina. "Ua seki tatou i totonu o le potu faatonutonu. Toe sefulu sekone, i le taimi e faapā ai."

Na piilima Savina. O le potu faatonutonu o loo i tua i le Keliapinisiki 88, i totonu o se tasi o fale tuai tuulafoaiina i le vaitaimi o le Sovieta. E tele inisia sa latou galulue ai i totonu o le tamai potu o televise ma komepiuta. O le taimi e tuua ai le nofoaga e tagata uma, e tolusefulu meapueata eseese o le a latou pueina ma faasalalau le nofoaga atoa.

Na faitau agai i lalo e le inisinia sekone. "Tolu...lua...tasi...siro."

Na lagona atu mai le faitoto'a silo le pa'ō o le fiti o se uaea eletise, ma matala ai ona petala e pei o se irisa o se mea pueata. A o latou matala faalautele, na lagona atu e le tamaitai le gogolo o le gasēsē o vai. Na ia laa atu i le irisa ma pupula atu agai i le pito. O se paipa uamea faatu i luga na pa'ū ifo e lua selau mita i le papa.

Na faatasi atu le inisinia i le tamaitai ma faasino atu se moliuila mamafa i lalo i le fa'a'ī o le paipa

o le maina. O le mamao i lalo ifo, na vaaia ai le iila o le tatafe malosi o atagia i le malamalama. O se vaitafe i lalo o le eleele. E tele ituaiga vai faapenei latou te faatafe eseina le Urale, o alavai tetele e tafe ifo mai a'ega maualuluga. I luga o le itu mamao atu o mauga, na tatafe atu ai vai i totonu o le Sami Kasepiana, a o iinei o ogavai latou te faatafeina ese i le faasologa o vaitafe, ua faasinotonu o le Teka ma le Opa, seia oo atu i le Vasa Aratika.

Na liliu Savina ma vaai atu i luga i le paipa malifa e tau atu i le laina i lalo o le Vai Karakei. O loo i ai le silia ma le faaselau le tele o kasa sotoronitiuma ma sesiuma, nai lo mea sa faamatuu atu i Kerenopili. Ma o le kasa oona o Kernopili sa faataamilo solo i le kelope. Na ia faataupupula ifo i tua, i lalo i le paipa tu sa'o i le ala vai o tatafe.

Sa avea ma se mea lamatia taufaafefe faifaipea. Na silafia lelei e tagata su'esu'e o le laueleele o le lalolagi, le tele o faafitauli to'atuga sa taatitia i lalo ifo o le Vai Karakei. Sa toe lava o se aga ona lūlū lea o se mafuie ma faapaina faasalalau ai se tasi o na faaputuga otaota ma lafoai atu ai lena anoano o kasa faaniukilia i totonu o le pesini o Mauga Urale. O suesuega a saienisi mai Nouei na latou fuafuaina o se faalavelave faapea o le a ia faaleagaina se vaega tele o le Vasa Aratika, o se tasi o vaega mulimuli o vao tele o le paneta. Mai iina, o ona kasa oona o le a tafe atu faataamilo i le paneta, ma faaputu ai ona leaga sili i le itu i matu o Europa. O le faitau a i latou o le Itu Faasao e tusa ma le selau miliona tagata maliliu mai le kanesa o aafiaga i kasa oona. Ma e faigofie ona faaluaina pe faatoluina lena fuainumera i aafiaga ma iuga mai le faaleagaina o le tamaoaiga ma le siosiomaga.

Na ia toe faatau pupula mai le paipa malifa i luga i le vaitafe i lalo. O se faalavelave faapea ua leva ona i ai, a e sa seāseā ona faailoaina. Na pau le mea e manaomia e le natura o sina suō.

Ona mu atoa lea o le lalolagi.

Na faasolo ina mamafa lana mānavanava, i lona mafaufau atu i le matautia o le mea o le a tupu. Mai totonu o lena afi faakasa oona, o le a ea a'e ai se Emepaea Rusia fou, e pei o se manulele o le fini e fanau ma tupu a'e mai faatafuno o latou lava otaota niukilia.

Na te le tuua se avanoa i se tasi lava mea e taofia mai ai o ia.

Na ia tupu ma ola a'e lona olaga iinei i le Uareni, ina ia tautuaina le Nuufaatinā. Ma i le mae'a ai o osigataulaga e tele, o le toto masaa e tele, o le a le mea ua totoe o Rusia? I le faitau sefulu o tausaga talu ai, na vaai e Savina le Nuufaatinā o liua e avea ma nuu pi'opi'o o le ata inosia o ia lava. I iinei i le iuga o lona olaga, o le a ia toe ofoina atu le faamoemoe. O le a avea lena mona talafaasolopito, e aumai ma faatino e lona lava atalii. O le a ia susunu ese le pulega pi'opi'o ma na toe foafoaina se lalolagi fou.

“Lau afioga le Taitai Sili? E i ai se isi mea?”

Na ia lūlū lona ulu ma pulea lelei ana upu. “Ua lava mea ua ou vaai i ai.”

Na lue atu le inisinia ma kolosi atu i se liva uamea i autafa o lana nofoaga faigaluega. Na foliga pei o se taofilima lapo'a o se taavale. Na ia iini le tatala o le liva, sii a'e le pa, ma amo atu i lona tau'au i le isi itu. Na tapuni le irisa i tamatamaivae o le tamaitai ma faamau le siafu. O loo i ai pea nisi galuega e fia fai. O le au galulue i maina, sa tutū e vaai le tatalaina o faitotoa silo, ua toe foi i a latou feau, sa kolosi ova atu i le irisa, e pei ona latou faia i le lua tausaga talu ai talu ona pa'ū le uluai siafu.

O le Gaioga Saturina ua sauni e amata.

Na faliu ese Savina ma savali aga'i i le nofoaafi o faatali mai. Na i ai foi nisi o ana tapenaga e fia faamae'a i le Keliapinisiki 88. Na ia vaai siaki lana uati. Ua tatau ona agai atu Nikolao i le sauniga i Keronipili i le isi itula. E ui ina sa faaletonu ana gaioga talu ai, a e na ia faatulaga lelei mea uma ia sagatonu. Pe i ai o ia pe leai, a ua taatia mea uma e pei ona fuafuaina, ma o le a faataunuaina lava. Ua faatulaga mea uma. E leai se mea na te taofia lona faataunuaina.

A o ia laa atu i totonu o le nofoaafi ma tapuni faitotoa, na ia toe tepa atu i tua i le fatu o le Gaioga Saturina. Na ia taumafai e vaai faaata le faitau miliona o le a maliliu, peitai o latou o ni mafauauga, o se numera e lapo'a tele tala atu o faamaumauga. Na ia toe faasaga i luma a o minoi le nofoaafi e foi atu agai i le Uareni i Keliapinisiki 88. Ua tatau ona sauni faiaoga ma le au suesue mo lo latou tuua o le nofoaga. Ua tape faamamā komepiuta, o faamaumauga ua susunu. O tamaiti foi ua tapenaina – a e lē mo le tuua o le nofoaga. O le a latou faia foi e latou se latou ti'eti'ega nofoaafi mo le taimi mulimuli.

O i latou uma, vaganā le toasefulu o le a latou faatasi ma ia.

Na faaata e Savina foliga o isi tamaiti. Na ia iloa le toatele o tamaiti i o latou igoa. A o sosolo atu le nofoaafi i le Uareni i le pogisa, na faalagolago atu Savina lona lima i le puipui. Na katete ma pei e sasape ona tulivae, a o lofia lona tino i faalogona. Na te le'i taumafai e tetee pe taofi. Na sosolo a'e i totonu o lona fatafata ma pupuni tau laoa ai lona fa'a'i. Na toulū ifo ni ona loimata vevela ma tafe ifo i ona alafau. I lenei taimi paganoa na o ia, na ia tuu atu ai i ona lagona e faailoa mai. Na ia amanaia lona tulaga tagata ma na faataga o ia e faanoanoa mo sina minute.

Peitai e na o le taimi nei lava.

E oo ane i le taimi na faalēmū ai le nofoaafi, na ia soloi ona foliga ma to'oto'o ona alafau. Na ia fai ni mānava se lua i totonu. Ua leai se toe foi i tua.

O le fai o le mea e tatau, o se matai sauā tele.

Ma o le a faapea foi ona ia matuā sauā.

9.32 taeao

Piripiate, Ukureni.

Na a'e atu Nikolao i totonu o le limosini faatasi ma Elena. O le laina o taavale na faasolo atu i fafo mai le nofoaga na faatulaga ai i luma o le Fale Talimalo o le Polisia. O le au polokiki ma ofisa eseese sa faafeao atu e leoleo po o a latou faafeao faapitoa. Talu mai le vaeluagalemu o le po, na lolofi mai ai le au faasalalau mai itu e fia o le lalolagi e faatulaga a latou masini pu'eata, o taavale pu'eata e fai enetena ma satellite. Talu ona malama le taeao, sa faapea foi ona lolofi atu tagata lauiloa ma logologoā i le mea o i ai le au faasalalau e fia maua se avanoa, se talanoaga, se ata e pu'e, poo se tafaoga foi, o se taimi ia lauiloa atili ai.

I nai itula, o le a vaai ai e mata o le lalolagi le mea o le a tupu i le tapunia o Keronipili, o se gaioga mulimuli e faaumatia ai le nofoaga niukilia tuai, a e tatala aloaia se nofoaga fou ma fonotaga fou e faalauiloa ai fuafuaga fou mo le lumanai.

Peitai o Nikolao, sa i ai lava ana ia fuafuaga mo le taimi nei.

Na tapuni loka mau loa faitotoa o le limosini, ona faato'a maua loa lea e Nikolao se taimi paganoa na o i laua ma Elena.

*(soso'o atu Sulu Samoa Novema 2024)*

---

# **O E UA FAI I LAGI LE FOLAUGA**

## **TOLOA TUATAUA SUANIU**

**SIMONA LAFULAFU A.**

**MISAOLEFALEMALIETO**

**26/2/1950 – 12/4/2024**

Na soifua mai le Tama i le Aso Sa 26/02/1950 a e na faamanava e le Atua ana feau i le Aso Faraile 12/04/2024 i le Maota Gasegase i Werribe Mercy Hospital i Melepone i Ausetalia. Ua 74 tausaga, 1 le masina ma aso e 18 le matua o lona soifua. O ona toe sauniga sa faia i le Malumalu o le Shalom Worship Centre i Campbellfield i Melepone Ausetalia. O le Susuga i le Faifeau o lea lava Ekalesia ia Esera sa ta'ita'i a e o a'u sa faaulufaleina le sa o le tamā mo ona toe sauniga, ma faia le molimau i le matou mafutaga i le ekalesia a o mafuta i Samoa nei.

Tele molimau o lea aso e pei o le tina ia Avavili Toloa i le la mafutaga ma le tamā, o Pelenatete Fautualii fai ma sui o le fanau, Susuga i le Aoao Fesoasoani ia Amaramo sa fai ma sui o uso ma tuafafine, Faamausili sa fai ma sui o lona aiga i Malie, a e o le Susuga i le Aoao Fesoasoani ia Fuatimau Tuautu Kalepo AF sa fai ma sui o lona aiga i Laulii. Sa molimauina ai o se tagata e toa lona lotu i le faatino o ona tiute, auā e le se tagata e matuā atoatoa lona malosī, a e sa ia faia galuega uma o le tautuaina o le fale o matai mai lona taulealea se'ia oo ina faasuaafaina e lona aiga, o le tausiga o lona aiga i le va feagai ai ma ona tuafafine, ma le toatele o le fanau mai lona aiga ma aiga o le tina ia Avavili na ia faafaiileina e pei o lana lava fanau moni.

O lana tautua i le ekalesia, ua loa ona tautua i le matafale lotu a e na fai ma Tiakono i le Aso Sa, 4/02/2001 seia oo ina valaau le Atua. Vagana ua gasegase le tama ma leai sona auala ona le vaai lea i le falesa i le Aso Sa. E le misi pese a le aufaipese, sa auai i galuega a le Aufaipese i le fausiaina o le Pulelaa ma le Laoai mo le falesa, o le taumafaiga o le CD ma le malaga i Niu Sila a le Aufaipese. Ua iloga lana tautua ma lana auaunaga i le Atua e ala i le ekalesia. Umi taimi o matou le mafuta ona ua malaga e saili fofo i

Ausetalia ma taofia ai ona o sa o le faama'i o le Koviti, seia oo ina le toe fautuaina e fomai se malaga i vaalele, a e sa faatino lava galuega uma i le matafale Tiakono. Ua iloga lava le tautua a le tamā.

O au lava na ta'ita'i i ona toe sauniga i le tuugamau i le fanua maliu o Bulla Cemetery i Melepone Ausetalia, ma matou faamavae atu ai i le pese faatofa a le Au Kerisiano.

Manuia Lau malaga tamā.

**Saunia susuga Pita Toleafoa FS,**

**EFKS Laulii,**

**Matagaluega VAIMAUGA.**

**FETULIMA SAUFO'I**

**TAMILIANO KONKILLI**

**(23/10/1958 – 11/7/2024)**

Na soifua mai Fetulima i le Aso Tofi 23/10/1958, a e na valaau le Atua ma faamanava feau i le ola nei i le Aso Tofi 11/07/2024. O ona toe sauniga sa faia i lana Ekalesia sa tautua mai ai i Laulii EFKS i le Aso Faraile 26/07/2024, ma o a'u lava na ta'ita'i. O le Susuga i le Faifeau Aso Fitu Misiona ia Mose na tatalo, a o le Faifeau o le Faapotopotoga a le Atua na faia le upu faamafanafana, mo fanau ma aiga ua tuua. Sa molimau lona aiga ma le afafine ia Oli ma ta'ua ai o se tagata e tautua ma le filifiliga ma le alofa i lana fanau ma lona aiga i ona uso ma tuagane. Sa faapea lava foi le molimau a le tina o le galuega, e finau lava ma tauivi ina ia faatino lana tautua ma lana auaunaga i le Atua e ala i le ekalesia i lona matafale lotu, aemaise o mea uma i le mafutaga a tina.

O ia o se Faiaoga a le Malo, ma e valaau le Matai o galue i le A'oga Tulaga Lua i Solosolo. E le'i faigofie foi i le Susuga i le Alii Pule A'oga ia Amituanai Leota Tino ona fai se molimau ona o se mafutaga e faagalo gatā, ma sa ia faafetaia ai foi meaalofa a le Atua sa i lea tina na mafai ona o latou a'oa'o mai ai, auā e lē oge auala lea tina e a'oa'o ai fanau i le potu lautele. O se faiaoga e soifua tapenapena ma saunia mo lona valaauina fai ma faia'oga, e molimau i ai ana api galuega o

---

le tausaga. Sa molimau foi le Asiasi A’oga o le Itumalo ia Savea Salapo Passi Levi, i le soifua galue o le tina, ma ia taua ai o se tina e sauā ina ia atamamai alo ma fanau a le atunuu, a e na fai ai foi o ia ma sui o le Matagaluega o Aoga e faafetaia le auaunaga a le tina ia Fetulima i tausaga e 45, ma aso e 162. O agavaa ma meaalofa ia mai le Atua, sa ia fa’aaogaina ma le tatau a o fai ai foi o ia ma Faiaoga Aso Sa i lenei aulotu i aso e tele o le mafutaga.

O le feau o lea aso, “*O le oti, o le feau mo tagata ola.*” Ina ia fai galuega uma ma le faatuatua ma le faamaoni a o maua le ola, auā e lē toe vivii atu i le Alii o i latou ua o ifo i le tuugamau. Amuia lea auauna auā e maua mai e lona Matai o loo faapea ona fai. Manuia lau malaga tina.

**Saunia susuga Pita Toleafoa FS,**  
**EFKS Lauili,**  
**Matagaluega VAIMAUGA.**

**LUISA SULAMANAIA**  
**FAUSIA TAUNESE**  
**(5/5/1965 – 14/7/2024)**

O le Tina ia Luisa, o se itutino moni lava o lenei aulotu. Sa soifua mai i le Aso Lulu, 5/5/1965 i lona aiga i Vailoa Palauli, a e na faamanava e le Atua ana feau i le olaga nei, ma motusia ai le matou mafutaga, aemaise o le tamā ia Sulamanaia Fausia Taunese i le Aso Sa, 14/07/24 i lona aiga i Lauili. Ua 59 tausaga, 2 masina ma aso e 10 le matua o lona soifua. O ona toe sauniga sa faia lava i le ekalesia sa tautua ai i Lauili i le Aso Lulu, 31/07/24, ma o a’u lava na ta’ita’i. Sa molimau le tamā ia Sulamanaia i le la mafutaga ma le tina, a o le Faletua i’u mai Piula ia Fasifai o le alo o le tina na fai ma sui o le fanau.

Na māua i molimau o se tina alofa ma loto maulalo, ma galue malosai foi mo lona aiga. O le molimau foi lea a le Tina o le Galuega i lana galue ai i le mafutaga a tina o le aulotu, ma faato’ā lē vaaia lava lona tino i galuega ma feau fai a le mafutaga ina ua maua i gasegase o le tino. Ua loa la la’ua tautua ma le tamā i le matafale lotu, a e na faaofia i le ekalesia i le Aso Sa 6 Novema

2005, ma o le molimau faaleagaga na fa’aautuina i le upu a Paulo i le Tusi ia Filipi 4:13, “*Ou te mafaia mea uma lava ona o ia ua faamalosi mai ia te a’u.*”

O a’u foi na ta’ita’i i ona sauniga mulimuli i lona oliolisaga tumau, ma matou faatofa atu ai i le pese faatofa a le au Kerisiano.

Tofa Tina, manuia lau malaga.

**Saunia susuga Pita Toleafoa FS,**  
**EFKS Lauili,**  
**Matagaluega VAIMAUGA.**

**I LENIU AVAONA FANENE**  
**1/12/1963 – 19/4/2024**

Na soifua mai I. Leniu i le Aso Sa 1/12/1963, a e na faamanavaina e le Atua ana feau i le Aso Faraile 19/4/2024, ma ua 60 tausaga, 4 masina ma le 19 aso o lona soifua. O ona toe sauniga sa faia i lana ekalesia sa tautua ai, EFKS Lauili i le Aso Gafua 6/5/2024. Sa molimau le Afioga i le Tiakono ia Toloa Topele e fai ma sui o le aiga o lona tama i Lauili a e o le Susuga i le A’oa’o Fesoasoani ia Li’o Tofa Foleni na fai ma sui o le aiga o lona tina i Sapapalii, a e o le tamaitai ia Vaasiva Lemi-Pritchard sa fai ma sui o le fanau.

O le molimau lava o se tina loto maulalo ma agamalu, e lē lagona so’o lona leo a e faatino lava le tautua alofa i lana fanau ma lona aiga ma le ekalesia. O le a misia lava e lana fanau ma lona aiga ona peiseai o ia lea sa faamatua i lo latou aiga ma si ana fanau ma nai a latou fanau. O au lava foi na taitai i ona toe sauniga i lona tuugamau, ona matou faamavae atu ai lea i le Pese faatofa a le Au-Kerisiano.

Ia manuia lau malaga.

**Saunia susuga Pita Toleafoa FS,**  
**EFKS Lauili,**  
**Matagaluega VAIMAUGA.**

---

## LUSIA TAMILIANO

(2/8/1973 – 7/6/2024)

Na soifua mai le tamaitai ia Lusua i le Aso Tofi, 2/8/1973, a e na faamanavaina e le Atua ana feau i le ola nei i le Aso Faraile 7/6/2024; ua 50 tausaga, 10 masina ma aso e 6 le matua o lona soifua. O ona toe sauniga sa faia lava i lona aiga i Laulii i le Aso Lulu 19/6/2024. Sa molimau lona tuagane ia Tasesa ma lona uso ia Tina, ma ta'ua ai o se tagata loto maualalo ma agalelei i fanau a ona uso ma tuagane. Molimau foi le Taitai o le Autalavou mo Keriso (YFC) o se tamaitai loto fesoasoani i le tele o fanau ina ia suia o latou olaga ma fa'aaoga tatauina o latou olaga mo le Alii.

E tele le sao o lenei tamaitai i lenei galuega auā ua loa taimi ma tausaga ua mavae o nofo i le fale o le galuega. Sa ma fa'aaogaina lava ma le tina o le galuega e fesoasoani ai i si a ma fanau e laiti, ma isi tamaitai o le aulotu i le tau amataina o le galuega i le nuu nei. Sa auai i le aufaipese, Faiaoga Aso Sa ma o ia foi sa fai ma taitai i le itupa o Tamaitai i le Autalavou. Fai mai le Poto (Failauga 12), “*I O lenei, ia e manatua Le na faia oe i ona po o lou taulealea, a o lei oo mai aso leaga, a o lei oo mai foi tausaga e te faapea ai, E leai so'u fiafia i ai.*”

O a'u lava na ta'ita'i i ona sauniga uma ma matou faamavae atu ai i le pese faatofa a le Au Kerisiano. Manuia lau malaga Lusua.

**Saunia susuga Pita Toleafoa FS,**

**EFKS Laulii,**

**Pulega Vaimauga Sasa'e,**

**MATAGALUEGA VAIMAUGA**

“*Ou te fia inu.*” Se tasi o taualaga a lo tatou Alii Faaola, mai luga o lona satauro. Lagona o le tagata a'ia'i, ua mago ma mātūtū, a e toe tu'u atu ma le vineka 'o'ona. O lagona i taimi o le maliu o se pele sili - e mātūtū, uma loimata, oona o tiga i le alofa. A o lona tino maliu, i le toto ma le vai na maligi mai ai, ua utu ai tiga ma faanoanoaga. Faamaise le Atua i loto faavauvau. **E.T.**

## MATAUAGA

TAULE'ALE'AUSUMAI

PAI'A'AUA TO'AFAPATELU

SA'ILIAI

23/3/1931 – 14/10/2024

“*Ona faapea atu lea o ia ia te i la'ua, 14 'Aua lua te taofi ia te a'u, auā ua faamanuia mai e le ALII la'u malaga; tu'u mai ia te a'u ia ou alu i lo'u matai...*”

O upu ia na momoli ai faamaisega ma se upu faamafanafana i le fanau ma le aiga, sulii ma feoi, o taulaga soifua ma ana lupe faalele i le Tala Lelei, ina ua logo mai le tala faanoanoa – o le tina matua a o se sili'aga o lenei Ekalesia, ua faamanavaina e le Atua ana galuega. O le 8.22pm i le po o le Aso Gafua, 14 Oketopa 2024, o le aso malolo o le Lotu Tamaiti, na valaau ai le Atua ia te ia.

**O MATAUAGA TAULE'ALE'AUSUMAI PAI'A'AUA TO'AFAPATELU SA'ILIAI**, o le meaaloa a le Atua i lana fanau, o lona aiga, o ona afioaga ma le Ekalesia Faapotopotoga Kerisiano Samoa. Na soifua mai o ia i le Aso Gafua, 23 Mati 1931, i ona tua'ā o le tamā ia Tuma'ai Sa'iliai o Safune, ma le tina ia Timena Vaili o Satapuala. E toatolu ona uso, ua maliliu le toalua. O ona tuagane e toafā; ua maliliu le toalua, o loo soifua mai nei le toalua e aofia ai le susuga i le alii Sea o le Sinoti i Upolu Sisifo, le Tausi Matagaluega o Sa'iliai Tuma'ai.

Na faaipoipo atu Matauaga ia **Pai'a'aua To'afa Vaele Patelu, o Matavai Safune**. E toasefulu ma le fa (14) le **fanau** (*children*); o tamaitai e toaiva ma alii e toalima. Ua maliliu le toafa o i latou, a o loo soifua mai pea le toasefulu. E faaopoopo i ai ma le la **fanau tausii** (*adopted*) e toasefulu ma le toalua (12). O lona uiga e toaluasefulu ma le toaono (26) i latou na faafaiileina i 'a'ao o le tina. O **fanau a fanau** (*grand children*) e toasefulu ma le toalima (15), a e toaluasefulu na le toalima (25) **fanau a fanau a lana fanau** (*great grand children*). Afai e tuufaatasi i latou uma na soifua mai le tina, e toavalusefulu ma le toalima (85). Viia le Atua ua

---

Ia faauluolaina le aiga, le nuu ma le Ekalesia e ala ia te ia.

O le **EFKS Matavai, Safune** lava na faae'etia ai lo la tofi Tiakono ma le tamā ma galulue ai lava. Na tuumalo le afioga i le alii tiakono i le 1996, ona aga'i mai ai lea o le tina ma mafuta ma le fanau i Upolu nei, auā le taumafaiga o a latou a'oga. O le vaitaimi lena sa amata ai loa lana tautua i le EFKS Ululoloa ma Siusega, ma fa'aaau mai ai lava seia oo ina valaau le Atua ia te ia.

O se tina e tautua sailimalo i soo se tafa o le Galuega a le Atua. E soifua fiafia e lagolago i fuafuaga a le Ekalesia, auā e oo lava i Laugatogi o A'oga a le Faifeau, e le misia sana tauofoga i faailoga i tausaga uma. O lana tauloto masani i nai ona alo o loo matou galulue, 'Ia faamalolosi e ave fanau i le Aoga Aso Sa ma le Aualavou, 'aua nei musuā e tautua le lotu i soo se itu.' O se tina e fiafia i le lotu, auā ma te taunuu mai i le galuega (*Setema 2011*), o loo faia pea lana masani o le savali mai lava i lona maota mo sauniga i Aso Sa taitasi; a ua valusefulu tausaga le soifua i lena taimi.

Sa ia tauasu ma punou faamaoni e tausi le Auaigaluega a le Atua i lena aulotu. E lē 'asa se Aso Sa i se saumolia e momoli mai faatasi ma alofaaga ma faamanuiaga i le galuega. Soo se Aso Faamanatu (*ft. Aso Sa Tina, Aso Sa Tama...*) e matua tapena lelei se toonai mo le faifeau ma lona aiga. O galuega faaFaamati a tina o le mafutaga, e taulamua ma e oo lava ina le toe lava mai i nei fuafuaga uma; a e sa fa'aaogaina lava le fanau e fai ma ona sui e faaleo ma momoli mai ai ni ana tapenaga.

E oo foi i le tapenaina o le Malumalu o le Atua mo tapuaiga, e valaau mai lona Matai o loo faapea lava ona ia fai. O lana tautua e masani ai e matalilo, e musu e folafola i lumāmea se taumafaiga ua ia mafai. Ua valaau le Atua ia te ia i le **93 tausaga, 6 masina ma aso e 22 o lona soifua**, a ua iloga lona sao tāua ua faia mo le Alii. O le a manatua pea e fai ma falea'oga aogā, ia i tatou uma o soifua ma ola e ofoina atu lo tatou malosi i le Tala Lelei. Matauaga e, oe le

tina peleina, e lē galo, e lē galo lava au galuega lelei sa faia i le tatou nuu ma le ekalesia.

Na ou 'ave'esea mai lona tino maliu nai le Maota Maliu o Ligoaligo, Malifa i le **Aso Lua, 22 Oketopa 2024** i le itula e 4.00 i le afiafi, ona momoli ai lea i le **Malumalu EFKS Ululoloa ma Siusega** mo ona **Sauniga Faaleaiga** (*Family Service*). Na ta'ita'ia lea e le Susuga i le alii Sea o le Ekalesia Metotisi mai le Matagaluega a Siumu, ma lupe faalele a aiga. Na mae'a ona soso'o ai lea ma Leoleoga o le Po, na faia lava i le malumalu nei. Ona tofa ai lea i lona maota i Ululoloa nei, seia aulia le **Aso Lulu, 23 Oketopa**, na faia ai ona **Toe Sauniga** (*Funeral Service*) i le 9.00 i le taeao, ona lagomau ai lea i lona oliolisaga tumau i lona aiga i Ululoloa lava.

O **Toe Sauniga** o le tina sa ou ta'ita'iina lava. Sa faaulufaleina lona sa i le malumalu e le susuga **Faitoaga Tolua FS** (*Faatonu Sulu Samoa*), o le **A'oa'o Faau'uina mai Malua o Filifili Malifa AM** na faitauina le Tusi Paia, a o le **Taitai o le Ekalesia Nasareta i Samoa** (*Susuga Peniamina Fakaua Pese*) sa fofogaina talosaga.

Sa 'au'au mafaufauga o lena sauniga i upu a le Aposetolo o Paulo ia Timoteo, "5 *Ua ou manatua le faatuatua faamaoni ua ia te oe, sa muai i ai ia Loi o le tina o lou tina, atoa ma Eunike lou tina; o la'u taofi o loo ia te oe foi. 6 O le mea lea, ou te faamanatu atu ai ia te oe, ia toe faamumū le meaalofo mai le Atua...*" 2 *Timoteo 1.*

O Matauaga, o le Faletua o le Tiakono, o le faletua o le alii tāua, o le to'oto'o sinasina o le mafutaga a tina, o lē sa ia faamumū le meaalofo o le tautua matavela ma le auauna faamaoni i le Alii lona Matai.

***Ia faatasi pea Iesu ma oe...E tumau le faamoemoe ia Iesu ta te toe feiloai ai!***

**Tofaina...tofaina oe le Auauna Tina a le Atua.**

**Saunia susuga Kerisimasi Sani FS,**  
**EFKS Ululoloa & Siusega,**  
**Pulega Faleata Sasa'e,**  
**MATAGALUEGA FALEATA.**

**MATAUAGA TAULEALEAUSUMAI**  
**PAIAUA TOAFA PATELU SAILIAI**



**I. LENIU AVAONA FANENE**


**TOLOA TUATAUA SUANIU SIMONA**  
**L.A. MISAALEFALEMALIETO**

IN LOVING MEMORY OF



TOLOA TUATAUA SUANIU  
SIMONA LAFULAFU ANETELEA  
MISAALEFALEMALIETO  
26 FEB 1950 - 12 APRIL 2024

**LUISA SULAMANAIA F. TAUNESE**



**FETULIMA SAUFO'I**



**LUSIA TAMILIANO**

